

處
實
堂
集

處實堂集卷之三

長洲張鳳翼伯題

七言律詩

春夜文太史徵仲文文學壽承休承王考功祿之勞
孝廉鳴玉彭山人孔加周文學公瑕集草堂得星
字

席門高駕枉耆齡
紫几爐烟混德馨
太史明天窺斗柄
少微今夜聚張星
谷溫雞黍充蔬具
厨熟尊羹薦瓦硯
更喜賡歌諧古調
忽疑春雪滿中庭

春日同彭孔加諸君泛太湖入花山寺因訪蔡山人

晴日乘舟春賞新太湖春色倍憐人波疑瀛海俱浮嶠花
作秦源好問津谷響和歌元自合林香送酒不辭頻羣公
更有烟霞思餘興還期訪隱淪

贈蔡山人和文太史韻

具區波浪白兼天曲徑巖花紅欲然門外雖無五楊柳丘
中別是一風烟道心澈澈觀魚樂往事悠悠躍馬年悵憶
隔湖招不得桂蓼落莫小山前

春夜奉陪文太史徵仲楊中丞弘之過周公瑕新齋
看杏花太史倡新年又見月當空之句命座中嗣
之率爾續貂

新年又見月當空
文讌清歡此夕同
滿院芳菲凝宿露
簾蔥舊度香風歌
殘玉樹渾忘夜句
續陽春媿未工却
喜醇醪似公瑾不
辭深酌杏花漿

九日陸儀部子傳彭隱君孔加過小南園有作次韻

二首

爲憐幽寂愜清言
小閣蓬蒿築小園
佳節有花迎落帽
仙郎無字學題門
池邊共寄梁興石
上勞携北海尊
涼月解窺疎樹入
片時逸思飛飛翻

佳辰尊酒薦萸房
短徑平涼席席張
自愧素琴叨水韻
漫勞新藻報瓊芳
忘機只合羣鷗鳥
習靜渾疑禮法王
此地

萬寶堂集 卷之三
願堪延上客况逢烟月好連牀

人日過王元美秋官小祇園

春先雲日已清嘉放舸乘潮覽物華喜見仙槁呈七葉却
從祇樹聽三車客來問主非緣竹鳥下窺人欲獻花不是
玄門成咫尺若爲塵境有烟霞

題小祇園藏經閣

林園寂歷足風烟飛閣凌空敞佛筵四水近連清淨海八
窓遙見大羅天蓮花盡証無名欲棣萼重輝未了緣聞道
雲梯攻不易可容張掾學參禪

集陳將軍園用幼于韻園在縣治北

寂寂長林駐物華
新開亭館學山家
尊中綠借將軍樹
座上紅欺縣令花
寶劒含星邀夜月
珠喉歌雪進流霞
從知清世鯨波息
牛斗高懸萬里槎

寄題玄陽洞

金庭玉柱鏡中懸
傳道玄陽洞壑偏
小有自來元借日
大羅何處不成天
雲開地肺留丹訣
水接花源長碧蓮
爲問童顏如可駐
還騎白鹿逗蒼烟

奉送少宰雲間陸師應召北上四首

明時求舊列揆賓
清望朝端屬寶臣
大治千官思作礪
王言五色出如綸
金閨夙著經邦略
紫綬長懸報主身
信是

行藏關世泰須知直道有通津

元卿冬日舊蜚聲詔語春溫報仰成三楫已知勤勸駕一行何惜任持衡雲開魏闕瞻儀鳳風暖皇州聽轉鶯品藻定教清仕路諸生翹首頌昇平

十年都養快登龍斗望高懸表辟靡何幸扶蓬充竹箭深慚砥劒作芙蓉化成樂育推三老道在調和弼九重到日太常韶樂奏須知商徵協黃鍾

清朝銓管快題才列宿森羅屬上台毀譽不淆從日至身名俱貢任雲來無勞漢相虛開閣何必燕山更築臺正是烹調新鼎命驛花應結和羹梅

掩關

莓苔封徑隔比隣病懶逢迎似隱淪閉戶好留青眼在論
交一任白頭新觀魚莫問誰知我種竹何須作主人信是
會心非必遠不同塵境卽通津

奉贈陸符卿子傳

符臺方喜得名卿早遂初衣遠物情九日尊鱸供命酒五
湖烟水濯塵纓人還合浦珠同價樹種藍田玉已成聞道
監輿耽勝賞百年蓮社足逢迎

李千鱗徐子與二使君相次北上餞之石湖

滉漾湖光到酒邊迢遙川色兩帆懸雙星向夕俱爲使千

里方舟並欲仙歷數青山移榻處重開紫氣度關年由來
春雪元同調并入簫韶獻御筵

晚過仲弟城南別業

白眉憐汝更翩翩青歲樓居不爲仙地擅叢林饒彩翠山
從返照借澄鮮塔中鴈影當窻序城上鸞枝入座連試問
西隣何所有應知俎豆慰三遷

送趙中丞元機督撫貴州

一鳴清譽滿朝陽九死批鱗出建章起廢赤心重捧日臨
邊白簡舊飛霜天開叅井台星入地盡西南聖化長輕
舸暫携琴鶴往持衡早晚肅鸛行

送沈道章禮太和山

逸興乘春更出羣東風挂席禮玄君神馳福地丹梯近夢
斷鈞天紫氣分猿鶴遙迎向長駕山川應進馬卿文舊遊
回首仙凡隔十二重樓何處雲

白燕

昭陽人去減芳菲花落蒼筤鎖禁闈無復霓裳當夜席獨
留月魄鬪春輝水晶簾淨迷冰剪玳瑁梁空映雪衣漫詫
入懷徵異夢素封吾已戰來肥

寄柳明府

三年一棹楚江分千里青山日暮雲茂苑自除新令尹灞

陵誰識故將軍花留縣裡春遺愛柳瑣門前早離羣當寧
正思強幹吏幾時飛舄謁明君

賦得白嶽山贈何侍御

由來靈境得仙名瑤島崔嵬卽五城繡壁香開雲水徑翠
微風落步虛聲探真已許青鸞過覽勝還宜驄馬行信是
玉皇香案吏應隨子晉學吹笙

分得修竹塢送王玄靜赴任閩中

湖湄一曲類淇園風外檀藥竹翠翻勝槩正當龍作嶺幽
期無用鳳題門佳人幾處歌羅袖仙侶曾同倒綠尊今日
王猷辭舊隱獨持清節向南藩

送陸太學入京

長夏江亭列祖筵清江送客使人憐誰云司馬題橋日已
是公孫使虜年芳草極天山色暮片帆飛雨別心懸掃門
會有知君者莫爲長途獨惘然

秋日宴集王少參直夫園次韻

水綠城南曲徑迴共憐秋賞草堂開萸香坐愛因風細竹
翠看疑入戶來促席更令談笑洽飛觴不爲管絃催淹留
子夜歡無極涼月翻驚已下臺

謁岳鄂王祠

武穆祠堂劒嶺偏秋風訪古獨潛然一丘葬地雲霞護萬

古忠魂日月懸誰遣驕胡迴白面空令父老泣朱仙當時
不飲黃龍府酹酒何須到九泉

姑蘇臺

姑蘇臺前江水流姑蘇臺邊麋鹿遊臺空世變渺陳迹日
落水淨天悠悠解衣喚渡誰者子吹笛岸傍漁父舟七十
二峯隔烟霧極目微茫生客愁

獨坐偶成

客散中庭景物幽碧梧新竹自林丘機心一付海鷗鳥世
態渾如風馬牛背水獨憐花作隊窺簾常得月爲鈞掃除
莫怪年來懶已信浮名晚更浮

殘梅和查允敬

不因春事獨心驚亦笑江梅比瘦生
取次繁華競紅紫若
為踈影自叅橫香消滿地魚鱗薄
風起迴塘蝶翅輕試問
青青樹頭子糝鹽何日副調羹

與袁履善郎中夜話

論心惜別十年輕握手偏憐無世情
歎爾爲官似劉向慚
予射策類匡衡狂生自不堪推轂
傲吏何曾解託名且向
歲寒歌古調莫辭桑落慰逢迎

上元芝蘭堂觀鰲山邀席中諸君同賦

蘭堂芳讌敞雲屏寶篆浮香夜
靄清映座華燈分月彩隔

簾嬌吹雜春聲金鰲欲破三山浪火樹齊開四照明聞道
馮商能作賦好將高調頌昇平

懷幼于讀書山中

空門理業動經年竹榻常依繡佛筵一壑風烟深五塢四
山花雨散諸天談經懸悟青蓮偈飛錫時過白足禪奈可
塵緣不相放未容姜被醉同眠

送孫將軍襲爵北上

少年投筆志須酬好借長風上國遊選將應歸大司馬能
文未可薄封侯烟開掛席雲光動曉發披星劔氣浮聞道
漢廷恩頗牧只今宵旰急防秋

和董子元避寇蒼川旅懷二首

搖落知君悵夜闌雞鳴空館曙光寒
愁邊轉覺鄉心切客裡偏驚末路難
異域兵戈勞問訊故年松竹半彫殘
高才曠有班生氣老去吳鉤不忍看

卞山茗水一憑闌迢遞憐君阻笑歡
白社風烟牽客夢青門花柳共誰看
宵征漸與江鄉遠野哭愁聞井邑殘
莫訝親朋無一字海天雲樹正漫漫

送張納言允清遊太和山

直北遙瞻紫氣懸片帆高挂漢陽川
非關白髮耽新賞自是青山有宿緣
瑤草烟消開福地洞門雲暖奏鈞天
從知

絳節逢迎處共道龐公采藥還

泊謝澤懷子行懋信恭先

倒景波光爭陸離夕陽浦口放帆時水邊野老却相問船上何人來獨遲燈火一時魚唱入江湖十載客星移生憎秋色先搖落況是臨風有所思

八月十四日集虎丘遇雨待月

近山選勝及佳辰列坐平臺倍爽神一壑風烟秋在樹諸天涼雨夜消塵扶筇不畏登山屐假蓋偏宜折角巾莫怪桂香雲外落宵分還見湧冰輪

贈別盧少楨

自是盧敖慕遠遊關河雲樹幾登樓上書已得辭梁獄
客何曾泣楚囚賦就江山雙玉案身同天地一虛舟相逢
無那忽成別極目孤帆懸客愁

慎侍御招飲魏國西園

名園華屋擁笙歌長日叨從載酒過頓覺霜威消暑盡偏
憐月榭得涼多橫橋翠色交松檜曲沼香風拂芰荷自是
淮南招隱地不妨深醉小山阿

和何內翰移家建業二首

江畔青山擁帝京由來朱雀土風清金門已是可忘世
傲吏那兼無宦情解組不騎西廐馬看花惟聽上林鶯何

勞海外求三島卽向人間得五城

十年高舉動神京自是詩傳庾亮清
上築已耽花外賞桂
冠無復世中情當窻翠黛千門柳隔水金梭百轉鶯取醉
不嫌頻顧曲爲君邀月鳳皇城

中秋華秋官從龍菰川園看月分賦涵燾亭

名園秋賞感賓從亭檻當山喝望通四座襟期千里合
首
年歡讌一宵同芙蓉半落金波裡眉黛齊開玉鏡中更有
桂葉能薦酒莫辭深夜醉香風

新春飲石湖小述

十年橋畔醉醺酣此日重憐憇綠蕪亂後風烟猶自足春

先雲物向人殊柳舒金縷催歌鳥山吐蛾眉入鏡湖却憶
舊遊成悵望客心搖曳片帆孤

縹緲峯

湖上孤峯類削成盤空石磴倚雲平攀躋忽覺虛無盡身
世真從縹緲行翠色低浮春嶂小烟光遙漾夕陽明相携
況是遊仙侶正好臨風理鳳笙

齊居感興二首

長日端居消世緣焚香惟晏日高眠若爲更有催租吏不
問曾無負郭田細雨自侵幽草濕春芳空覆小窻妍桃花
肯放漁人路好覓秦源老歲年

惟尋藁薄好逃名莫向金門慕請纓世態未能容傲吏時
人偏解役狂生漢南楊柳猶如此江左風流空復情賴有
濁醪堪自勞不妨呼客與同傾

寓讀雙塔寺僧舍遣懷

桑葉柳絲青短垣芳簾藥裹寄空門東風老去鶯花約北
郭朝來烽火繁慟哭無人知阮籍掃除祇自媿陳蕃看雲
浪作書空字時事驚心不敢言

人日陸子行伍道鳴吳恭先集雙塔寺

野寺風烟絕四隣佳辰雲物倍宜人青松白屋一尊酒
葉梅花齊放春勝裡不須銀闕巧盤中惟有菜傳新江鄉

已慰羣賢集無用題詩寄所親

贈別紀從事仁旭

雞山悵別十年餘鴈候相憐音信踈高唱近傳凌憲府使
車頻見侶江漁論交海內風期遠計日天南夢寐初才在
莫嫌黃綬拙逢迎不遣綠尊虛

瀧息軒

王孫別業靜年芳身世逍遙何有鄉詎謂高枝能鷄息自
來機事與鷗忘雲開蘭澤香風暖地接平湖水氣涼漫詫
扣門多結駟不教清夢遠羲皇

春夜戲效義山體答薛士立

春來恨殺小腰肢，奈可風前楊柳絲。
露冷芙蓉寄心後，香殘琥珀夢回時。
天涯路北東隣近，門裡書傳北鴈遲。
莫訝低頭緣底事，窺窻曾許月明知。

送周公瑕應辟入京

津亭春色動征蓬，千里徵書下碧空。
開閣已勞丞相待，掃門何必舍人通。
名高和璞終收楚，賦就甘泉喜薦雄。
北道自來多地主，度關應不俟繻同。

元日登北寺塔時重修落成

雞辰風口愜招尋，鴈塔巖巖試一臨。
二梵果中應是福，百年劫後再成林。
城懸北斗開天象，標出西湖接地陰。
欲向

上方題姓字躋攀不覺入雲深

和公瑕悼亡

銷歇春芳月已昏
亭亭無復舊容存
空憐死後能通夢
却自神傷不可言
巫峽雨添長別淚
蓬山雲擁未招魂
朝來莫拂青菱鏡
只恐猶沾黛粉痕

蛛絲網落花

簷牙蛛網細縈空
誰向冰紈綴小紅
豈爲有情牽故苑
不因無力任東風
欲窺珠箔春絲繫
自織芳心曉夢通
回首綠陰何處是
子規聲裡月明中

和袁魯望桃園紀事

桃源萬樹錦屏高何事能令綵騎停玉貌捲簾花裡出春
聲隔葉坐中聽目隨雲送三生約心許犀通一點靈試問
當筵狂杜牧夜深醉眼爲誰醒

燕市懷歸二首

一從鳴鳳下朝陽幾許流鶯遶建章長樂曉鐘虛立仗始
清仙樂報焚香詞臣染翰鵷班入帝子開宮綺陌長障
扇不堪塵拂面白雲何處是吾鄉

帝里春深淑氣遲天街無地踏香泥逢人客坐三緘口到
處官衙一局棋叔夜不堪徒自遣馬卿多病欲何之歸時
若遇高陽侶有酒如澠醉肯辭

經留城

破楚勲勞曾報漢爲韓心事托封留房星一別人間世泗
水孤城日夜浮動地風雲黃石略極天烟樹赤松遊廿年
仗策成虛擲獨立祠前生客愁

送吳侍御出守太平

帝城春色競芳菲天上銅章下禁闈三輔旬宣勞豸史兩
都風裁仗霜威臺端雅望懸驄馬江畔公庭遶翠微不是
入宮應見妬名山須待謝玄暉

觀雙塔放燈

岩巖鴈塔粲繁星晃樣渾疑不夜城雙闕中分河影亂兩

峯高並月華清蓮花競証三生果火樹齊開四照明漫向
空中窺色相還將上界燭題名

幼于弟遊包山歸示予諸作感舊遊漫賦

縹渺峯前信宿留逍遙身世恍丹丘梅花樹樹千門雪橘
柚家家萬戶侯載酒探奇朝蕩槳競歌燒燭夜登樓無端
夢斷池塘上却爲新詩憶舊遊

仲春望彭孔加黃醇甫周公瑕王元美敬美同集袁
魯望齋中見雪探得先字

高齋卜夜促芳筵浙瀝飛霞落酒邊占歲未嫌三白後入
春猶占萬花先遲回淑氣中分日零亂殘梅欲暮天取醉

莫愁燒燭盡當庭玉樹照人妍

送黎考功出參廣西

妙年通籍典銓衡甄拔遙同小阮名華轍暫移三始後桂
林欣見一枝清山當獨秀青雲勢江入相思白社情天遠
漫勞題鴈素頌聲早晚出龍城

分得垂虹橋贈王郡推

城隅碧樹玉千行天畔垂虹駕石梁不盡烟波通震澤有
時風雨類瀟湘三江浴日憑吞吐萬里奔濤接混茫欲濟
巨川舟楫在應知題柱意飛揚

西苑志感

芙蓉別殿未央西
爐氣晨飄雉尾齊
出洛神龜將寶籙
嘶花馴鹿進金闥
近臣拾翠供玄草
使者乘驄訪碧雞
一自六龍天上去
幾回清禁改璇題

分得垂虹橋送吳別駕擢南秋官

東吳別有一吳公
佐郡聲華治洛同
州縣頻煩新命日
平反以恕古人風
官從半刺曾題坐
望協清班再入宮
帝里白雲瞻不極
獨餘明月照垂虹

雨深戲效長慶體和文長公壽承

雨深山徑鎖莓苔
三鳥嘶書杳未回
柳絮猖狂春已去
杏花零落燕空來
泉清漫解經時渴
燭燼惟存昨夜灰
聞道

楚雲徵綵賦幾能飛夢到瓊臺

仲氏自金陵書回輒有此作

辟水名卿樹典刑遙聞吾弟侍傳經翩翩一任飛鴻鴈
韓無煩歎鵲鴿句裡春回渾是草天涯人聚各成星懸知
親舍雲常白極望應教眼獨青

詹侍御汝欽抗疏被譴寄贈

北闕迢遙五夜鐘西風回首薊門蹤身同江夏無雙價疏
作延平第二封名下昔年慚附驥臺端此日羨批龍恩波
不久環應賜直道何須歎未逢

雨夜懷仲氏下第客金陵

空林風雨夜何顛支枕三更悵不眠桂子月中香自落棣
華天外夢猶牽竟驚滄海遺珠日淚盡荆山抱璞年豈是
大才成獨晚還應結網羨臨淵

聞鐘有感

關河月落夜聞鐘客思凄其歎未逢何必入宮方見妬已
知投筆亦難封頻年膠柱工齊瑟到處循牆走葉龍披拂
不須興慶柳歸來還撫故園松

秋夜聞砧

金風蕭颯喚愁生何處遙傳搗練聲把酒不堪燈下聽授
衣獨切客中情千門夢斷黃昏月萬里寒催白帝城想見

深閨應脉脉緘題誰爲寄卿卿

次韻答文基聖亦解嘲之意

夢斷梨雲冷蝶覓風催花信作寒溫年來玉潤都虛憶何處瑤華忽記存春服漫憐成勝日香車無復破苔痕維摩已是逃禪客那得新愁減舊恩

和答錢叔寶

紫駟西去向誰憐極目愁連草色偏院落沉沉春二月池塘濯濯柳三眠鶯花短夢迷新賞風雨空窻憶故年漫詫君平堪問卜明河欲賦不成篇

寄問俞從事臥病

經時春病掩荆扉帶比休文更減圍枕上梨花三月暮琴
中心事十年違夕陽客去愁懸榻夜雨誰邊說息機最是
東風易生恨不知何計遣芳菲

園中玉蘭海棠並開

樹樹芳菲可斷腸交加脂粉雜新粧光迎火齊還分色氣
借蘭膏別有香月姊弄珠迴絳節紅樓燒燭舞霓裳上林
何物能勝此獨許薇花接建章

次韻寄答毛太史元喜二首

高臥懸知白眼空下才勞憶愧乘風郢歌清紙情何極巴
雪連天思不窮野老於人旣相狎寒翁體道豈無同盈虛

莫辨乾坤意搔首江干送暝鴻

京華懷刺憶吹噓劍外詩傳報起予極目浮雲迷玉壘傷
心山色老銀魚三青疑作回峯鴈尺素先成隔歲書聞道
丹砂經九轉何年羽翼渡良餘

再疊前韻二首

鏡機無事復書空導引年來欲御風天地難容莊叟傲乾
坤獨遣阮途窮宜男晚種清齋後槿樹朝觀造物同萬里
殷勤緘尺素莫須惆悵託賓鴻

山館陽回淑氣噓天涯消息却愁予文園已謂閑司馬直
道翻令嘆史魚玉樹定知收碩果青箱猶可寄殘書春來

應見充間兆遠信須傳一紙餘

仲秋十八日宿翠微精舍

松蘿一徑寶香浮萬劫銷沉四望幽明月入山偏傍寺澄
湖到夜更宜秋投身蓮宇維摩榻回首烟波范蠡舟信道
三生猶是幻不教風物起人愁

和俞從事悼亡妾次韻

十年秦嶺狎吹簫一夜秋霜委絳桃釵折玉搔塵匣鏡花
殘金縷冷彈槽擁衾有淚留珊枕裁恨無功在寶刀爲謝
畫工圖軟障舊緣應許續韋臯

客有以近體賦得愛妾換馬戲効二首

其一

主人別妾

漫憐眉黛得卿卿怪底携將易五明
氣盡王關應邁往寵隨金屋再粧成
驅馳已逐天涯草雲雨空餘夢裡情
不爲封侯恩頓薄從來報國一身輕

其二

妾報主人

霜蹄一遇擲蛾眉鏡裡容光好爲誰
棄去豈緣新愛奪從征不覺故情移
漫言骨在千金值無復珠還十斛時
待得虺隤君不顧須來檢取敝羅幃

嶺南梁大理詳刑江南輒有此贈

泣罪由來是帝仁關河三月捋綵綸
不寬共信于公在

勿喜應從雋母申
嶺表梅花鄉國夢
車前棠樹渡江春
懸知結襪君能事
乘暇頻勞訪隱淪

寄答張都諫欽伯

晚將崑玉獻明廷
風度應如張九齡
夕拜瑣闥頻問夜
朝從天仗獨披星
苑花有意供浮白
䟽草無心入汗青
自笑不才勞見憶
空林長日尚窮經

送張明府擢比部入京

三年治劇政先成
雙鳥應從闕下行
秋入西曹雲自白
花開南國縣空明
尊前別思催征旆
舟畔驪歌襍頌聲
聞道清朝刑欲措
知君簪筆善持平

七夕立秋

薄暮蟬聲何太悲
陰陰灌木起涼颼
梧桐一葉初飄夜
河漢雙星欲渡時
火傍赤龍迴法駕
秋從青鳥下瑤池
穿鍼浪說人間夕
不道潘郎感鬢絲

贈答吳山人

吳郎丰格本翩翩
信美新詩一再傳
客裡秋風應自賦
握中春雪向誰憐
閑評藥價韓康市
漫逐烟波范蠡船
試問朱門頻曳履
何如山寺學逃禪

對鏡

蹉跎勲業一垂綸
鏡裡年華象外身
不爲黃金減顏色
自

憐白壁老風塵醉來豈必頭濡墨夢破那知筆有神怪底
烟霞鎖苦逕獨令魚鳥得相親

送仲弟之留都

雲外青楓隱石頭片帆西趣大江流
滄洲曙色催新別上苑風光憶舊遊
遍揮茱萸自佳節離羣鴻鴈獨賓秋
天街夜冷霜華重莫爲逢迎典客裘

送王招叔同其門人華比部入京

吳市南頭老校書入都應不俟公車江鄉佳節還吹帽
帝里高門欲曳裾教學總知同絳帳陸沉何必珮金魚問
奇有客如相訊三徑蒼苔載酒餘

任俠

隨身寶劍血模糊
遍索歌姬向酒壚
手奪鸕鷀傾琥珀
醉騎款段拂珊瑚
報讎不爲千金壽
校獵寧誇七貴俱
却笑書生老章句
風塵京洛歎投珠

次韻寄幼于

孤飛一鴈鳳城東
木落天寒訪故宮
失路共憐窮阮籍
託名私喜得羊公
書空條字青雲杳
待月懷人白晝同
賴有仙郎歌郢曲
陽春先到草堂中

賦得富春橋送王明府擢春官員外郎

富春橋畔祖春官
天外飛鳬奮羽翰
才望遙凌司馬柱
清

風近接子陵灘歌當白雪休論和路入青雲自不難到日
宮墻新御柳知君鳴珮侍金鑾

挽李于鱗

倉徨遠信朔風回拭淚應悲冀北才世外浮雲真幻出樓
中白雪漫神來丹成石室青山老碧化遙空紫氣開高唱
只今凌憲府獨留明月照琴臺

掃雪煮茗

獸炭初紅夜未央花融六出點旗槍寒凝掌上金莖露暖
瀉壺中玉女漿擁篲漸分殘竹粉傾筐猶帶落梅香掃門
不是延高駕自爲相如浣渴腸

皇甫僉憲期張燈觀二妓適與座客深飲不能赴

作

使君燈宴絕氛埃入夜邀歡綺席開老去才情渾未減春
來花月更相催雙迴舞袖翻新燕並倚宮粧點落梅怪底
狂生追不及獨扶殘醉立池臺

黃吉甫亡命經年事白自建康過余輒有贈

世人欲殺我空憐遠信驚傳又四年只恐婆娑生意盡方
知落魄死灰然由來天地容投止到處江山有宿緣應見
片帆回建業舊京詞賦獨翩翩

送蔣平仲計偕北上時與伊春官同舟

朝辭三徑問通津謁 帝明光拱北辰行役莫愁彫客鬢
恩波應見渥儒紳公車待詔風雲日驛路傳經桃李春聞
說大胥隆國士同舟況是薦雄人

送吳之衛入京

東風二月柳方舒已及紅亭送客初映戶縣花迎候發凝
香竹榻入春虛懷中好握將投刺篋底應藏未上書聞道
朱門喜推轂知君不用歎無車

送徐太史公望還朝

片帆西望草萋萋二月江城綠已齊行日關河應惜別到
時桃李卽成蹊朝迎金輅驂鸞馭夜宿瑤池作鳳棲自信

無文似司馬餘光安得借然藜

送勞惟敏守安吉

對策卽爲中大夫一州自試亦三吳去年同作明經士此
日看分刺史符浩蕩烟波仍震澤清嘉風土勝姑蘇懸知
計最君能事不久芳聲籍 帝都

畫夢恍然有覺

筠窓踈影畫續紛倚病維摩對此君但向性中求淨土不
須身外始浮雲收回白足無行識落盡青蓮得見聞忽憶
前生趺坐處空堂禪榻尚餘芬

園居漫成

沉冥吾自得長林息影閑
消伏櫪心老去美人難再賦
悲來梁父不成吟坐當膝處
曾穿榻雲到臺前直作琴何
物遠教傳尺素却令興往氣
蕭森

送顧山人謁吳明卿使君

故舊相逢一黯然天涯作客
向誰憐計言顧况離家日已
及蘇卿使虜年彈鋏風塵消
鴈外銜杯歲月老花前洛陽
年少今頭白可惜吳公喜薦
賢

池上作

濯纓吾已得滄浪散髮長歌
雲水鄉習氣未除書學好閑
心欲與釣竿忘藥苗次第供
新病花事差池減舊狂最喜

北窗堪寄傲不妨幽夢到羲皇

張廉憲欽伯解組自滇歸吳奉贈

五湖隨地可垂綸萬里歸來物外身對酒且呼齊辯士當
歌不畏楚狂人春山騁望開襟遠野寺尋幽寄賞新却愧
倦遊成閉戶不同張翰出風塵

過越溪禪房

經春不到越來溪草長空門路欲迷燦燦野花仍煖若娟
娟石竹自菩提閑房白足驚新雨繡壁蒼苔點舊題我醉
還從禪榻臥不妨嶺外日沉西

病酒

竹徑偏慚自主賓誰言宋玉是西隣釣竿已罷任公子草
色空憐虞美人月度綺筵花卜夜歌翻玉樹烏驚春煩病
不爲相如渴無奈傷多酒入唇

莫子文予先君小友也今年已六十感而贈之

翩翩裘馬自風流忽忽年華六十秋老眼未輪掄趙壁新
聲猶擅傳齊謳倦飛北道應無主短賦東家亦有丘待得
乘田重變海不妨追躡赤松遊

陳姬年二十四生辰去五日而近戲贈

珠簾雙捲赤城標曲曲闌干倚翠翹花信風前辭玉笛月
明橋上教瓊簫鉛華豈爲留春御心事無煩解珮要但用

絲絲纏素魄容光常不減嬌嬈

公瑕携具叔貽山水草堂有作次韻

無才無分鳳皇池竹徑桐陰野性宜小弟開軒成晤對嘉賓挈榼豈須辭灣疑消夏巖巒影花學長春棣萼姿更喜當尊能顧曲雅歌應不藉彈絲

賦得觀鵞亭贈施常州

千年寶地絕塵氛江左風流晉右軍已向山陰修禊事還來池上看鵞羣丹霞瑣徑蒼苔合綠水憑欄碧藻分乘暇探幽一懷古須知揮手拂烟雲

答徐丈紹卿

尺素遙從紫氣間，知君幽意在青山。
金庭閱歲龍常臥，珠樹經秋鶴未還。
萬頃滄波開白社，百年丹竈駐紅顏。
桂藂已爲嘉招發，何必空林獨掩關。

夜坐

竹牀支枕薏燈明，病裡維摩思獨清。
但覺眼前俱長物，那知身外有浮名。
月涵池鏡成空相，風奏松簧作梵聲。
顧我已醒蕉鹿夢，不關塵世棄君平。

徐文敏祠堂爲其季子太素賦

赤城風物接郊墟，學士祠堂俯碧渠。
講座兩朝調玉燭，靈巖千載葬銀魚。
門前桃李梁公樹，篋底縹緲鄴架書。

白眉新廟貌蘇香那得奉華裾

上元與潘中丞諸公集周公瑕鑒止堂觀燈

美人池館碧城隅燈宴通宵景物殊隔水金枝驕翡翠凌
波火樹出珊瑚陽春入曲俱成調明月當庭總是珠更喜
醇醪似公瑾不煩執法醉淳于

是日座上客有一再賦詩者作此和之

次第東風入酒杯參差火齊耀池臺人間玉樹中庭見天
上璫花夾水栽桃李忽開何必雨魚龍驚蟄不因雷郢歌
自有陽春在莫倚馮商作賦才

微酣短述

舊遊回首漫清狂。此夕微酣。媚羽觴。四座高談幾捫蝨。十年岐路。再亡羊。卷舒隨分同遽瑗。婚嫁相將畢。向長不是離羣。成傲癖。薜蘿深處足徜徉。

雨霽漫成

竹徑含風瑣薜蘿。白雲黃鳥自經過。清商一部孫登嘯。扣角彌年竊戚歌。席地偶然爭野老。書空無事羨虞羅。振衣不厭花枝濕。日落岡頭爽氣多。

北寺醫僧爲叔貽療瘍詩以謝之

日出汀洲塔影移。經禪之暇習軒岐。無邊紅杏迷珠樹。不謝青蓮吐上池。自我晨昏驚夢草。藉君信宿慰連枝。折肱

何必通醫術信是瘍師卽藥師

幼于應試留都寄蔣刑部子徵

長林寂歷遠時髦尺素多君問訊勞玄武南頭容吏隱白
雲西望是仙曹人留霄漢虛三徑思入秋風感二毛吾弟
只今應負笑懸知戀戀在綈袍

下第別徐太史公望

彈冠清世獨驚魂挾策無緣扣帝關短褐十年心未死
長途三上舌猶存智瑩寶出寧非德李廣難封亦是恩此
日驅車更搔首可容重掃相公門

王祠部敬美携具相餞

數奇吾已識長貧勞苦多君意獨親廊廟豈無推轂侶風
塵自有泣珠人當歌動作三年別倚醉行成千里身歸路
莫嫌頻計日到時欲及未殘春

途值大宗伯陸公以酒肴見遺時公與難弟京兆方
舟

仙舟雙駕擁旌旗驛路填笮次第吹門下獨憐原憲病車
前頻負晏嬰知家山南斗懸新夢歸計東岡守故陂慰勞
一尊增感泣數行欲下是臨岐

答黃公補見贈次韻

南雲迢遞賦歸來東閣差教獨未開年似關西真晚暮

辭冀北更遲迴山中白壁元無價天上黃金別有臺此去
相望莫相問羊城鹿苑總蒿萊

答黃公紹見寄次韻

待詔金門事已非空持寶劍欲何依孤蓬東下俱飄泊雙
鴈南征總倦飛帝闕雲霄成縹渺江鄉花柳漫芳菲春
風正恰斑斕舞奈可舟中換旅衣

月下渡淮

青徐東下片帆輕暝色微茫混太清大海氣吞孤月小長
淮勢合兩川平乘風此夜慚宗慙擊楫何年慰祖生搔首
不禁雙淚落竭來踪跡一浮萍

答徐丈紹卿

倦遊依舊掩荆扉
短徑長歌願不違
自喜楊朱無避席
番嫌壺子未忘機
花深臺榭迷青眼
雲白湖天瑣翠微
待得洞庭秋葉下
木蘭應拂芰荷衣

飲山水草堂

濁醪相對息塵機
雲起池亭暑氣微
散髮頗宜河朔飲
忘形渾脫薜蘿衣
莫辭觴政催人醉
但看山花間雨飛
吾豈陸沉金馬客
風雪只合詠而歸

送薛士立刺福寧

握手欣逢舊酒徒
新恩初拜試分符
出江釋褐遭明主
閩

海寨帷作大夫職在專城均五馬令行下邑壓雙鳬浮
絕頂應窮目曾有家山入望無

感夢

彌年箕踞鍛干將作室蹉跎頓道傍自笑寒翁猶失馬人
言岐路易亡羊庶民懷璧春城旦賈客藏珠泣夜光奈可
壯心銷未盡忽令清夢復飛揚

自勵

私車三駕只窮途再別歸來獨向隅堂下有時聽擊筑門
前無分學吹竽蕭疎曉鏡新蓬鬢狼籍春風舊酒壚猶恐
徵書下霄漢三冬未足副懸珠

志感

盛世掄材盡豫章
梗枿次第入明堂
十年未脫山中骨
三上空沾輦下香
王掾黑頭應不賤
許丞重聽亦何傷
漢庭老少皆時好
獨遣狂生泣夜光

寄答沈君典

迷津傾盖卽相憐
鄉國移舟又隔年
別後夢魂隨汝去
向來音問倩人傳
朝窺斗柄青萍合
夜閱陰符紫氣懸
倚杖不禁雙目盡
江南江北暮雲天

王元美中丞自鄖陽以詩報予有無分題屏之句率
有此答并復慰勞之意

峩峩玄嶽隔雲泥雙鯉何來綵筆題滿眼蓬蒿朝借色不
言桃李下成蹊陸沉豈必淹金馬勝負從教老木雞莫謂
致身無上策通津須筏自應迷

有感漫成

牀頭勲業老吳鉤夢裡行藏更倚樓莫笑揚雄疲執戟由
來李蔡合封侯津迷北道非無主客謂東家亦有丘土窟
避人吾豈敢登臺聊與白雲求

答陸水部羽行

空園搖落感升沉籜隕商風秋色深淚盡燕山三刖足書
來豐沛一論心陽春喜見文成賦流水猶叨調入琴奈可

陸機方入洛張華先已二毛侵

訪胡孟弢于報國寺馬上口占以贈

鴻都結客少年場匹馬衝風入
帝鄉邊孝五經元有笥
鄭莊千里不齋糧行將玉殿瞻鵠鵲
斲向珠林宿鳳皇
見說臺成高北斗可無詞賦謁明光

贈金伯韶

清朝俊又集彤墀弱冠明經非爾誰
賦就士衡文自在論
傳蕭遠命應知握中照乘終成寶匣裏
千將未是雌
聖代只今方好少相逢把酒莫低眉

舟阻漕河遇王世廉輒有此贈

牧豕應非使虜時
食牛況過入秦期
青萍不與人俱老
白壁何愁世莫知
慷慨一杯心獨壯
飄零千里鬢雙絲
只今誰結王生被
盛事空傳張釋之

北歸渡黃河

濁河東下勢飛翻
萬里奔騰赴海門
地自崑崙分大麓
天從星宿發真源
風塵極望蒼山小
水氣連空白日昏
慷慨去來俱浪跡
烹鮮聊且罄餘尊

呂梁

蒼崖屈伏擁長川
白浪湯湯異昔年
野火堤邊成瓠子
猛瀾木末變桑田
乾坤漭沆頻驚眼
歲月蹉跎好息肩
家食

不須占利涉獨令蹈水得真詮

經桃源望諸葛武侯廟

桃花無樹照千村夾岸孤岡廟貌存
梁父一時遭漢主漁人何處覓秦源
青春岐路終彈鋏明月安流好命尊
老我已非舟楫用桑麻雞犬自柴門

馮化之薛士立二大夫携尊小園

野服初成岸漉巾大夫緩帶亦天真
與君試作十日飲顧我可爲千載人
浮白不辭金谷數眼青方洗玉京塵
暫時星聚且行樂來日雲泥隨屈伸

病後自述

漆園別有一莊周盡日逍遙物外遊花發曲江渾是夢
青南浦不生愁覽輝詎作三年鳥抱病寧披五月裘漫說
黃金臺百尺低昂未可易林丘

贈黃都督鎮定海

冠軍名字許誰倫十載勲勞動紫宸上計千艘頻報最平
蠻七縱獨稱神樓船出沒楊侯略斥堠分明李尉身此去
韜鈴雄虎豹卽看圖畫入麒麟

來君選見過小園卽別去輒有此贈

春風星散玉京塵此日相過一愴神顧我已爲東道主憐
君猶是北歸人尊羹未及思家候雞黍先供拜毋身別後

行藏不須問大都明月各垂綸

寄題薛士立城南別業

聞道城南樂事宜新開別墅不緣基賦成樓閣真吾土水
傍滄浪作習池蠻舍朦朧深豹霧女牆高下接鸞枝知君
計日應之郡幽賞從今莫後時

小園與王君之對酌

仲夏城東景物宜誅茆開徑試傾杯但須痛飲雄河朔那
惜沉酣倒接羅扇引青團仍却御歌催白苧不成詞尊前
會遣形神洽不醉王忱待幾時

曉起自述

年來踪跡轉踈狂不出盧鴻舊草堂墨守敢辭丹鳳闕素
封已得白雲鄉池塘水長知魚樂枕簟涼生許夢長漱石
亦應堪礪齒何須難舌學含香

病中灌桂樹

一枝已足息鷓鴣多病那知恨沈寥計我尚堪彭澤令其
如先折沈郎腰乾坤自信壺中大歲月從伊隙裡消所喜
桂叢當戶合秋來不藉小山招

原正姪釋褐以水部典徂徠迎大兄就養以書勸予
就公車作此答之

廿年龍劒一鴻毛戰藝空慚老豹韜魂夢已知非爾輩飛

鳴那復望吾曹
棣華近惜元兄別
水部遙憐使者勞
西北只今輪輓急
佇看勲業起臨漕

夢亡弟叔貽携老僧過園居感而有作

世棄無煩論絕交
柴門那得有僧敲
素絲幸不從人染
玄守何曾解客嘲
懷壁一身餘兩足
泣珠雙淚盡同胞
棣華零落荆花死
只合雲松結小巢

秋夕仲氏籠鷺移尊待月怡曠軒
予為畜鷺開尊輒有此作邀仲同賦

園林秋色淨
亭臺吾弟携尊引客來
玄守應同玄鴈序
紫微能代紫荆開
鷺羣校畜臨池樂
竹葉兄酬待月杯
老我

吹埴渾漫興和箎須藉惠連才

贈陳士振

太平挾策老河汾偃蹇如予復見君廿載明經窺戴禮彌
年獻賦歎劉蕡膝前有玉俱成樹橐底無金不用分更喜
長松對青鬢翱翔堪與鶴爲羣

雨中與王玄靜話舊因寄山中諸上人

委徑新鋤野菜鮮濁醪相對各茫然十年舊事挑燈說一
夜空堂聽雨眠老我漫憐潘岳賦羨君能力邵平田遠公
不死青山在只合招邀禮白蓮

過王別駕越溪庄漫題

十里橫塘一鏡明，九龍如黛曉妝成。
山中桂子元宜隱，湖上芙蓉別有城。
紫蟹正肥秋漸老，黃粱纔熟夢初驚。
涸公莫笑淹留久，自愛臨流可濯纓。

答沈君典殿撰書問

翩翩雙札下長安，誰謂青雲問訊難。
千里丰神傳尺素，隔年杯酒憶餘歡。
褐寬浪說終當釋，冠敝其如不可彈。
珍重數行無以報，祇應清夢繞臺鸞。

送文子悱宰浦江

送別心驚霜葉紅，布帆高挂浦陽風。
憐君繩武如楊賜，老我通家媿孔融。
孤鶴甞時棲海樹，雙鳬計日起瑤空。
亦知

設醴非難事不得携舟一涸公

雙峯

日暮柴門梁父歌遙山其奈謝公何送青眉黛烟光合並
蒂芙蓉爽氣多巫峽數峯真縹緲蓬壺三島自嵒嵒我年來
頗有冥棲志問訊還應叩薜蘿

題韓幹野牧圖

渥洼水草正當時天許蘭筋野牧宜未遇子方應棄老難
逢伯樂敢稱奇偶然赭白曾題賦豈必玄黃盡入詩千載
獨憐韓幹筆不教巖穴肖胥靡

趙太史汝邁出副粵憲過訪

清華內署夜光懸趙璧由來天下傳鳳闕一封干北極羊
城千里忽南遷館中直筆誰成史江上輕舟總是仙乘暇
不辭勞借訪甞時能結薜蘿緣

讀沈秋官純甫詩

扣閤一疏敢批鱗九死投荒萬里身折檻可留旌直氣賜
環未見返孤臣迤邐道路詩言志慷慨風雲筆有神却笑
忘機湖海客若爲三復亦沾巾

過湯應之給事園居

夕郎選勝得喬林讀禮餘閑逸興深庭薄忽驚花似玉家
園不羨谷名金側身泉石巖廊隱極目雲霄魏闕心計日

暫棲珠樹鶴和鳴還在帝城陰

送黃進士使邊歸省還朝

使星曄曄向神京一山皇華壯客行
釋褐相將登仕籍籌邊先試請長纓
名齊江夏無雙重路入青徐五兩輕
最是王程應計日柔條欲折獨含情

老將

一身百戰力無遺回首燕然淚兩頤
豈是封侯終不偶自緣飛將數稱奇
玉關生入驚來日金印腰懸總過時
聞說漢廷今好少拊髀那復問龐眉

飲陳游擊

從來意氣薄風雲貴賤交情自出羣亭下不愁呵醉尉田
間且復飲將軍綠沉苔臥空言勇綵筆花生敢論文却笑
名高凌籍福若爲供帳候田君

春懷寄答公望太史

敝裘三月出都門只合閑身老漆園竹徑筍根添稚子天
涯草色憶王孫雨餘漫試東山屐客至能空北海尊不是
和鳴辜盛世自來野鶴畏乘軒

趙太史汝邁自山陰書問并存以詩次韻奉答

一江烟水接三吳千里論才愧兩都豈是雄文無薦客自
應雌伏老臞儒堯心未達終成隱禹穴書傳獨向隅珍重

明堂須趙璧賜環何日返蓬壺

鄭貳府督課入京官衙得子

聲華籍籍佐麟符國計勞賢入
帝都千里烟波瞻北極
一航風月夢西湖雲間賦就班
鷁列丹穴書傳報鳳雛想
得彤庭方錫宴遙分恩澤照
懸弧

寄答徐公望侍讀

小堂鷄息蔭高梧千里音徽夢
帝都舊雨不煩疑出處
客星只合在江湖隱非捷徑元
同石泣下滄溟豈爲珠漫
說縛纓蘭未解少卿冠服已成
胡

遙題滕王閣

雲中飛閣望崔嵬異代猶傳帝子閒無復容星聯軫翼竟
如人世隔蓬萊寒潭縹緲蒼山入落日微茫紫氣催自媿
虛名後盧駱長風何必借時來

送李長洲以外艱歸

妙年治劇播清芬田野謳歌到處聞五月居廬稱孝子四
方觀禮惜神君縣花點點飛紅淚鳬鷺飄飄赴白雲江上
不禁攀戀意片帆恣絕望中分

奉送經師杜公自蜀憲擢叅貴藩

憶昔芸窗侍下帷廿年紅體嫺傳衣生憎原憲貧非病幸
見壺公衡者機江上錦城移使節雲中叅井候征騑懸知

今德冬之日佇看西南草木晞

老母誕辰讌客有作

潘輿秋賞御家園生日留賓掃華門有誤自矜能顧曲不
空那復惜傾尊孫枝繞膝渾疑桂母氏忘憂合是萱雌伏
祇耽烏鳥戀敢期鴻鵠快飛騫

送丁仲心侍御擢僉蜀憲

金蹕玉璽錦官城蜀險寧辭驄馬行萬里先聲開憲府三
年宿望重留京捫參漸覺天梯近叱馭應教鳥道平諭旨
不煩持漢節綏懷須見慰 皇情

冒雪赴蔣少參子徵之招

蒼雲朝合雪漉漉振策言從勝侶招僊臥已煩風掃徑啓
扉驚覩玉封條空中競裂齊統素酒次渾添泰復陶信步
不愁東郭履揭來偏喜踐瑯瑤

贈王明府䟽鑿垂虹橋成

名高三輔兩分符䟽鑿應知萬姓蘇耆舊暫時歡借寇聲
華今日勝投巫四方舟楫通吳會千頃膏腴沃具區聞道
臺郎須幹吏卽看金闕起雙鳬

次韻答陳倉曹汝化見贈

鶚思鵬搏未許同由來飛伏辯雌雄酒邊擊筑歌徒壯門
內吹竽瑟漫工滄海泣珠時不偶故人折節意何窮帝

城自分無緣入詎敢移書借子公

里中黃中舍以使事便道壽母

新年寶婺藹春輝芳讌欣當晝繡歸雪色不侵堂上草條
風宜舞膝前衣十洲青鳥瑤池使二葉仙萸玉女扉計日
圭章下丹闕應教歡賞擅慈幃

次韻答王敬美參岳見寄

遠信經年一字無豫章那得下東吳詩成白雪情何極夢
入青山興不孤簪紱莫愁淹仕路風烟吾亦慰窮途時呈
小伎君休訝蓬鬢於今豈壯夫

詹汝欽參岳自閩來吳陳倉部汝化贈以二律邀予

同賦次韻

絕憐高蹈出風塵肯向湘潭歎不辰江上青山新拭目
頭白簡舊批鱗誰云金馬宜驄馬豈必通津好問津況有
羣公熙帝載何妨泉石着閑人
抗疏青蒲著赤忠歸來咄咄獨書空朝陽自昔推鳴鳳輦
下于今說避驄千里遨遊雙屐外十年契闊一杯中和歌
賸有巴人在誰謂雲泥調不同

送陳汝化二首汝化時蒙官謗

秋江烟柳拂離旌直道誰憐解組輕卽景駸言應日至伏
以謗議合風生東山暫寄夔龍臥北闕難容仗馬鳴獨有

故人偏惜別臨岐忽忽倍含情

獨憐折節下狂生戀戀貧交非世情已見三年成築室那
知二卯棄干城飄然舒卷無榮辱久矣身名較重輕不是
抽簪君太早臨流暫爾濯塵纓

漫作

逢人豈必眼常青任意乾坤一委形兩川燕臺悲獻玉廿
年吳國老明經空門自合聽花雨帝座何須有客星却
笑校書天祿者獨令虛閑草玄亭

息交二首

竹牀蒲簟對焚香謝客常虛舊草堂已識曹丘非長者指

嫌季布喜游揚眼青眼白成空相機事機心付兩忘耳熱
不辭歌擊壤敢云清世有嵇康

公車久困卽鹽車中坂迢遙稅駕初今日息肩猶恨晚頻
年川足竟何如閉門任客來題鳳罷釣知吾不羨魚一枕
蟬聲睡方足肯令臺省易幽居

郝劉二令君招飲徐氏園亭

雙鳬欣見兩王喬綺席叨承郭外招燕濯入筵疑鼓舞鶯
聲出谷雜歌謠政觴亦自花驚眼下士寧辭禮折腰不是
神君勤採擇座中那得有芻蕘

屠長卿明府以詩見投走筆次韻附答

待詔公車敢復論
遂初成賦獨尋孫
無時已學龐公隱
有
毋難酬仲子恩
雙鬢經秋蟬抱葉
頻年謝客鳳題門
遙憐
仙吏投明月三復
惟應倒綠尊

劉侍御邀觀王美人不得赴賦此爲報

濠梁三鳥下重霄
報道仙姬亦子喬
曲裏鳳皇寧易顧
酒
邊鸚鵡不須調
嬌癡似欲凌秦史
綽態遙憐妬楚腰
奈可
明河徒可望不勝
惆悵負嘉招

贈郭光祿子靜

壯年勲業紹汾陽
晚節投閑逸興長
虎阜雲霞從笑傲
鹿
門烟月任平章
壺中未老雙烏兔
膝下將飛兩鳳皇
聞說

清朝求舊德還期魏闕快翱翔

送周光通同徐孝廉北上

君今別去欲何如歲晚飄零似謫居
北道主人筵設醴南州孺子載同車
莫言代舍堪彈鋏須信都門好上書
倘見故交相問訊灌園吾已習耰鋤

解嘲

負來何須望有年晚來生計硯爲田
班超未擲傭書筆季主寧辭買卜錢
閑挂杖頭供取酒頻探囊底給烹鮮
功名已薄紛爭息豈向官家請助邊

諸將

聞說燕然好勒銘須知勲業在青萍登壇令出千鈞重報
國身同五兩輕戊巳到時成巨鎮嫖姚過處卽長城功成
肘後懸金印不似書生漫請纓

上元日同劉僉憲宴徐太學長吉小乘菴觀燈徐劉
倩也

名園仕節敞賓筵拂樹春輝四座憐燈燭星羅城不夜笙
歌鼎沸樂鈞天雨花近見如來界火齊遙同舍利懸賸有
珠璣凌絲賦還輸冰玉競清妍

上元過徐建甫觀燈感孔加名甫曾望善卿昭叔道
禎諸君昔爲同席今皆物故有作

高齋新賞得春先
酒畔歡踪感昔年
徹夜華燈仍舞席
向陽棠葉又歌筵
野人訪勝還乘興
公子忘疲自象賢
重憶同遊半彫落
不禁回首獨潸然

過原明菴訪徐孝甫感昔

一編借榻學逃禪
屈指于今二十年
此日憐君隱文豹
春風許我問青蓮
本來面目雲中觀
自在菩提石上緣
奈可夕陽催返棹
不禁餘興鐵巖前

爲潘文學賦得鶴澗

赤壁勝遊空復情
華陽隱居虛勒銘
何如公子青山隱
獨許仙禽玄澗行
遼瀛不事千歲約
遙天應達九臯聲
投閑

賸有安仁賦好爵於君還和鳴

送馮化之憲副移鎮寧海

朝移北鎮擁南旌
報到鄴江萬舸迎
風裁舊懸青瑣重聲
華今與法星平折衝席上惟尊俎禦侮胷中有甲兵海晏
暫時勞緩帶知君計日入持衡

春晚獨坐

野性由來洽辟蘿
民生安樂孰知它
試看花落春如此待
得河清壽幾何
白首交疎空按劍
青山日暮好揮戈
無才自乏匡時略
扣角難同甯戚歌

王中丞元美悟玄修真排筌欲仙奉寄

君本玉皇香案吏偶來金闕作名卿仕經三已心無愠道
在千言著欲成紫氣昔曾迎尹喜丹砂今果會方平蓬萊
不隔人間世何日揚帆到五城

答沈君典修撰書問

園樹成陰書掩闥忽來三鳥一開顏先生自合稱玄晏學
士何緣在碧山雲護敬亭淹歲月書來震澤負躋攀那能
借却澄江練同上扁舟散髮還

君典自石湖別去將有震澤之遊信宿不相聞計已
返棹作詩訊之

芳尊湖上競逢迎執手難傾惠子情知爾風濤觀震澤計

言舟楫返宣城夢懸北闕頻支枕身在東山好勒銘遽玉
卷舒應自得畏途何必戰心兵

王中丞元美以予不就公車賦詩見贈次韻奉答

公車四上轉漂淪天許投閑浪曳身三徑憑誰過蔣詡百
金隨我盡蘇秦醉鄉清濁供支枕心事浮沉屬釣綸敢謂
窮愁雄著述東山尚有未徵人

初秋玉蘭再花

每見枝頭花先葉今從葉底見花開入秋省識春風面不
夜偏驚明月來南國江淹曾夢筆東隣宋玉故多才小園
誰謂渾蕭瑟亦有霓裳進綠醅

胡孟弢下第歸過予小園贈之

淚盡金臺及暮春秋風猶是敝裘身竭來莫歎投珠客到
處元多倒屣人材老豫章堪作柱神留魏闕未爲臣青雲
不遠扶搖路何必招尋學隱淪

分得盧溝橋送潘宮保還朝

飛梁百丈跨盧溝雲擁長虹拱鳳樓北極恩波天咫尺西
來爽氣日沉浮桑乾水入添奇觀瓠子功成得壯遊駟馬
高凌題柱客許身直作濟川舟

哭治平寺慧朗二上人効長慶體

去年秋入山中寺二衲婆娑振錫迎今日山門尋寺主可

憐次第涅槃行香臺露冷青蓮觀客座霜寒白社盟借問
西津雙寶筏幾時石上証三生

送王敬美督學關西兼寄楊使君

簡書分陝屬賢勞憲節重移見羽毛仙侶暫遺交甫珮難
兄持贈呂虔刀聲先樂育青衿奮道在傳經紫氣高好向
關西語夫子故人今已晏蓬蒿

送袁黃巖拙任襄陽

黃巖課最幾經年佐郡襄陽再命傳祇謂鳳雛宜別駕肯
容驥足着先鞭峴山碑在應懷古葛井泉清不羨仙想得
行春多勝賞暫時留醉習池邊

朱東阿構亭迎養庭有一槐適符其乃公別號因以
名亭爲賦一律

子奇年少宰東阿同載無煩白首過迎養祇須勤卜築嘉
名恰喜兆庭柯春風聽訟賢聲籍暇日承顏樂事多豈必
王公三樹植一株先已報婆婆

淮上沿河得龍骨勒碑

由來海藏遼龍城龍骨何緣此勒銘豈是神龍上天去獨
留晚骨告河清當年沉璧人安在今日防川續用成五位
不須勤減膳百僚早已賀昇平

贈湯應之黃門

官謗新罹暫解裝畏途知爾卜行藏紫宸方切延朝奏青
瑣何緣罷夕郎隨意卷舒鴻漸吉任人寒暖雀羅張園林
入夏清陰合正好焚香讀老莊

過周公瑕西山別業

城隅舊隱足風烟別業新開地更偏近市似嫌平仲宅移
居應慕葛洪仙明樓爽氣千巖秀遶屋清流萬壑泉我欲
溷公淹信宿來朝還有問奇船

臥病不得赴湖上之約

庭梧葉落已蕭蕭委徑封苔轉沈寥邁社未開陶令酒桂
藁應負小山招秋來佳句探囊盡老去雄心伏枕銷漫憶

峯頭與湖上可能支策傍漁樵

贈劉令君

清朝釋褐羨劉寬劇邑分符試羽翰漫說操刀元不易卽
看遊刃自非難以星應最三年績到日能令兆姓安 聖
主方思彊幹吏須纓柱後惠文冠

雨後登虎丘

名山近郭日紛紜過雨來登景物分蠟屐偏宜叩竹杖鈴
華都洗石榴裙千年劒氣池頭月一壑鐘聲座上雲此夕
遠公蓮社裏可容無酒醉陶君

蔣少叅子徵携酒至

秋深委巷似江村寂歷空園掩草門經月抱疴猶禁酒一
時沾醉感携尊寒暄變態青雲見歲晚交知白首論何必
桃花能避世清朝亦有客尋源

曾倉部枉過小園坐移晷卽赴憲院之讌

千倉玉粟課三吳簡命賢勞督轉輸使節獨因寒士折高
軒寧厭席門紆園蔬促摘芳初薦騶從言旋日未晡應是
協恭籌國計不辭法酒醉淳于

有感漫成答朱文學

造化小兒齊物後滄浪漁父濯纓初夢中閱歷夫容老鏡
裏行藏齒髮踈小試已成奔北將大觀應得指南車覆瓿

不怪時人笑自是楊雄喜著書

陳貳守德基枉過小園賦謝

朝披藻賦挹丰神旋辱高車顧隱淪
氣借投醪寒谷暖交成傾蓋白頭新
華簪豈合光賓座野褐何緣作主人
自是升沉有同調不嫌張竦異陳遵

冬夜與仲氏陪徐司理茂吳集傅令君伯俊衙齋席

上探得春字

相看仙吏出風塵別有襟期物外論
榻下南州應卜夜尊傾北海自生春
琴堂坐久霜華重花縣詩成月色新
綵筆已能酬白雪吹埴一闕媿巴人

寄答梅禹金

弱冠聲華起敬亭豈惟吳市有梅生
馳神此日魚雙往落
鬼何年鳥一鳴
海內文章應屈指
天涯兄弟各含情
知君六翮搏風健
莫學江東老步兵

獨坐有懷王文學順之

門外荆榛奈若何
晚來三徑自婆娑
愁邊咄咄書空字
酒後嗚嗚擊缶歌
北極扣闥游旣倦
西堂夢草淚偏多
日斜抱膝成孤坐
那得羊求一見過

冬夜傳令君携尊曲
水草堂邀馮孝廉
咸甫同集馮有作次韻

房山先生集 卷之三
美人飛蓋駐空庭，谷暖經寒草尚青。令客別淹吳地月，少微仍聚漢年星。雲霄暫許鴻留影，枳棘何妨鳳寓形。興劇不知冬夜永，追陪那惜醉還醒。

贈答華亭蔡山人

歲晏荒園一對君，脩然野鶴出雞羣。社中已解推詩細，座上何勞借虎賁。會見焦桐追古調，豈無真草綴遺文。三江百里堪乘興，不必雲間有白雲。

聞徐太史病痊喜而有作

抱疴暫養東山望，勿藥無憊北闕期。真訣神傳要百日，大川聖授不移時。熊羆入夢開麟趾，鶴鷺虛班俟鳳池。陰德

自應酬 帝祉丙公曾有夏侯知

新春十日過飲勞惟敏秋官沾醉漫作并邀陸纂甫

同賦

誰今斗石醉淳于月白叨從子大夫清世幸寬中聖律花
時不羨步兵厨當尊謝樹連城壁列屋華燈照乘珠應有
士衡抽藻思高歌一曲是吳趨

答盧中舍嘉廉手書

玉殿紅雲捧赭袍仙官侍從卽盧敖百年老去雙龍劍盧大

父伯仲皆仕宦有聲

奕葉重輝一鳳毛通籍不嫌開閣晚起家無待

掃門勞殷勤尺素遙相問珍重行行金錯刀

寄魏司訓季朗

尺素緘題問魏舒
江城消息近何如
若爲歲計微沾祿
想得春來檄校書
日誦萬言官獨冷
朝彈一劔出無車
懸知故舊開東閣
金馬相將典石渠

得塞上捷音

紅塵一騎捷書飛
上將光生燭紫微
信是六師三戰後
肯容疋馬隻輪歸
嫖姚漫說新驅虜
曲逆應慚舊解圍
想得彤庭歡飲至
昇平齊祝慰宵衣

遲徐太史公望不至時病痊

傳聞陽羨曉帆開
信宿西風悵未來
一水馳神虛命酒
片

雲極目自登臺願貞宜吉非關藥鼎否初傾可和梅漫說
草堂星欲聚少微何日傍三台

無題

前身偷藥廣寒遊碧海青天幾度秋圓處容光羞對鏡闕
時心緒桂吞鉤神馳蕭史雙鸞馭興到鴟夷一葉舟不遣
休文衣帶緩相携還上庾公樓

文基聖新成虎丘別業同王玄靜吳恭先落之

晚傍名山小結廬也應不遣故人踈佳辰載酒尋源處仙
侶同舟訪戴初曲水通池延倒景短塙栽樹護幽居從知
五畝投閑足何必都門十上書

送鄭司訓會試

年來寄跡廣文官燈火青氈自歲寒五斗暫憐淹驥足一
飛行見快鵬搏彫庭好曳尚書履白屋應彈貢禹冠聞說
曲江春酒熟直須扶醉上雕鞍

送馮咸甫會試時尊君京兆方解組

京兆上書辭魏闕孝廉挾策別庭闈還吳共喜迎張翰入
洛人爭羨陸機計日致身應釋褐看雲回首莫沾衣知君
忠孝承家世許國寧教願獨違

答陳本容次韻

伏櫪年來已壯心論交一諾愧千金填箠對客叨同調慙

醉先秋敢浪吟堂上主人慚北道酒邊琴操擅南音多君
不厭忘機者忽有新詩抵漢陰

送陳貳府德基入賀

風含津樹片帆揚辰極召羣驂路長行日敢辭三伏熱到
時先進萬年觴名高驚座凌鵝鵲卜協和鳴舞鳳皇前席
倘蒙宣室問應知佐郡有循良

虎墩漁舫爲閩胡憲使賦

昔年虎墩渡虎去此日虎墩存虎名不俟乘槎近天稷絕
憐航海卽蓬瀛烟波一壑鮫人集網罟千艘蜃市成更喜
列泉通地肺偏宜仙客濯塵纓

文基聖自山庄過予奉其博士公集托以校勘因志
所感

朝來扣戶一論文小坐廻橈已夕曛城市往還多爲我溪
山輕重却緣君遺編歲月黃梁夢殘墨龍蛇白練裙往事
觸心應下淚山陽長笛不堪聞

中秋有懷効長慶體

故人已作中秋別新月空吟千里詩想得江頭戍夜泊不
堪回首作天涯無邊落木憑誰遣不盡鄉心各自知計日
南來有賓鴈可無尺素慰相思

浙岳晴雲爲胡明府賦

漸山佳氣鬱葱葱誰洗蛾眉曉鏡中宿霧乍收滄水使片
雲初出楚王宮峯頭縹緲疑籠日樹杪氤氳欲御風仙吏
莫愁親舍遠且將潤澤代天工

寄蔣學諭平仲

三徑新歸舊主人一官初晚薄游身羊腸世路看知險雞
肋浮名較孰親契闊故交惟半在廣文餘祿未全貧吳淞
秫釀相將熟可許羊求醉白蘋

送徐太史公望還朝并致弄璋之祝

朝從陽羨片帆開忽漫三江祖席催岐路兢觴中聖客瀛
洲傾佇列仙才雲隨綵筆窺中秘春動文星燭上台聞說

充閭應有慶飛書何日慰蒿萊

送劉明府入覲

江城爲政共稱神祖席爭攀奏最身
雨若不須昆反火風行知是寵勤
民六龍捧日千門曉百辟朝宗萬國春
漫說計偕應附驥泥蟠臨別媿飛輪

閱三閭五穀二大夫像

每於青史得吾師忽復披圖慰所思
澤畔行吟憂楚日虞庭緘默入秦時
三閭自葬千秋骨百里非輕五穀皮
此日神交小窻下不須廟貌肅神祠

經恬澹觀朱戶玄室都扃惟見白鸚鵡
愛而賦此

隴西珠樹故羣空江左風烟海郡東玄室已知扃綺戶素衣猶自鎖雕籠能言莫歎徒存舌不染誰云可入宮惜也正平雄作賦就羈身亦在樊中

至海上遙歸漫作

一航信宿了歸程歸到園廬自有情倒屣無人迎趙壹託名何必得羊卿塗中曳尾貧身貴物外看雲白眼明三復王沉釋時論手書應可作門屏

寄答孔炎宗侯獻賦之問

何來遠信扣衡門秉燭開絨喜命尊老去狂吟媿梁父夢回草色屬王孫驪珠入掌知龍種郢雪連天憶兔園欲獻

本無平子賦榮枯今已任乾坤

白水草堂爲子厚國尉賦

成臯南望鬱南陽龍臥清時別有岡白水舊分如帶地朱
門新構讀書堂月從叢桂窺窻戶雲出方城護棟梁八斗
已知雄藻賦千秋不羨魯靈光

掩關

紙窻閒卷蕤名香何必談禪禮法王閉戶五年成鷄息出
門一寸卽羊腸池塘水鳥供幽賞籬落寒英護短墻生事
日來俱抱甕只疑身世是羲皇

歲癸未公瑕年已七十矣上元其懸弧之辰詩以介

之

稀齡龍臥望逾新
華館張燈喜及辰
南極壽星纏處士
上元夜宴列仙人
將飛膝下青衿子
難老尊前白髮身
莫訝坐來能顧曲
調高元自協陽春

寄答務本宗侯

風塵疇昔感投醪
尺素重緘蔚綵毫
魯酒未傾神獨往
楚雲中斷夢徒勞
丹成地肺玄綵鬢
賦就天孫製錦袍
信是宗星聯紫極
聲華寧數太行高

湯義叔過小園夜談贈之因寄聲孟弼諸君

薊門傾蓋數年來
千里私車爲我迴
歲月應收和氏璧
風

霜漸老豫章材挑燈寒夜歡重卜掃徑經時喜一開君去
定逢胡孟輩好因仲蔚說蒿萊

懷用晦諸王孫

豫章書札下雲霄十載神交引夢遙奈可壯心銷歲月漸
看生計落漁樵斗間紫氣分龍劍賦裏金聲協鳳韶怪底
年來無一字沉浮多恐付洪喬

郡伯八閩朱公一再惠臨奉贈

鸞和五馬駕高軒里巷頻仍訪華門鶚息自慚貧士傳龍
光叨沐使君恩章程星列科條簡聲教雲行土俗敦威惠
已知三輔最南陽朱季復何論

題芝石圖寄壽清卿許公仲貽於建鄴

帝城紫氣鬱芙蓉海內儀刑重秩宗千仞鳳翔臺是鳳百
年龍臥道猶龍孫曾已見承家學几杖還堪禮辟雍何必
采芝供大藥且傾醪醕發黃封

送太常素公抑之赴任留都

彥溪清望重清卿十載東山無世情推轂疏連鵠觀起
家身陟鳳皇城殷王禮聘勤三使漢室儀文備五更聖
代只今須舊德應知早晚入持衡

得孫文學書却寄

風塵作客尺書傳問我情蹤祇自憐池上年來幾草聖酒

邊時復一中賢忘機泛泛將馴鳥映水亭亭欲放蓮只待
孫登陵阮嘯薊門何日着歸鞭

贈陶秋官懋中時外補毘陵別駕

會稽靈秀日氤氲綵筆崢嶸紫翠分千里何能羈驥足一
亭聊復玩鷺羣常郡有觀鷺亭停車澤國還成雨稅駕秋曹別是
雲世掌絲綸知爾事豈惟詩酒繼陶君

寄荅吳幼安

信美昂昂野鶴姿飄零湖海使人悲明廷自不容張儉石
室惟應老趙岐懷刺彌年隨爾敝然灰何日借人吹天涯
兄弟重相問只恐相逢鬢已絲

宋貳令被獎

憲府飛書獎掖勤雅知輿論入風聞折腰暫受江南米展足須超冀北羣弭盜潛銷荏澤霧種松坐憇訟庭雲廣平遺烈千秋在應有聞孫紹德芬

正月十五日集徐建甫新園觀燈

華堂芳讌及春先燈席留歡後苑偏月度笙歌陽律動雲開樓閣夜光懸小山火樹渾疑桂隔水金枝盡是蓮更有主人徐邈在不妨乘興一中賢

上元仲氏邀韓州守袁太卿馮文學集文起堂蔣少
叅周文學挈榼是夕微雨

上元燒燭夜筵紅勝侶携尊燕賞同陽律入篋溫黍谷暗
塵飛曲落梅風霏霏玉屑談何易冉冉金罍酒不空卽有
微雲隱河漢德星知聚草堂中

賦得石澗贈趙華玉

山中趙璧價連城抱璞元無宰世情巖壑十年成遠志潺
湲滿耳濯塵纓坐看鬱鬱長松立行處青青幽草生一水
亦知蒼雪勝可容野鶴入鷗盟

園梅發花紀興

東閣將無臭味同也應開落小園中瑤琴乍鼓先春雪玉
笛仍吹子夜風漫向池塘弄清淺不須草莽嘆丰叢廣平

戰藝非頻北千載誰傳藻賦雄

奉投憲副金先生孟陽

烟霞元自有金張豈必朱門好頡頏道在耦耕投末契身
慚獨行借餘光百年未老猶龍臥千仞難攀綵鳳翔聞說
泰交應擊壤倚歌何日和滄浪

送馮憲副化之擢叅楚藩

千里謳歌殷夏雷一封除目自天來欣聞憲府膚公奏正
值清朝泰道開鶴馭近辭寧海樹鮫冰先坼渡江梅野王
久負持衡望暫借藩宣老相才

賦得蘭臺贈欽上舍

翩翩逸翮羨通家
韞玉偏憐感歲華
名在辟雍推照乘
賦成江海建高牙
登臺晚學蘇門嘯
入室春芳楚畹花
開閣已知應內舉
東陵寧老邵平瓜

送仲氏重遊浙中訪張開府

會稽禹穴足遊敖
覽勝寧辭應接勞
倒屣定留青眼在
陟岡知戀白雲高
惠連夢斷迷春草
李賀囊成富綵毫
封壤逍遙諸蟻伏
觀濤莫羨冠山鰲

五月三日劉傳二令君招飲虎丘得丘字

鴈堂高譙蕭鳴騶
野服叨從令客遊
雙鳥相將飛魏闕
百壺聊復亂觥觥
籌麈消法雨
渾忘暑座對清風
直作秋況是

浴蘭佳節近肯辭長日醉林丘

傳令君伯俊携具曲水草堂酌陳太守思貞邀予兄
弟同集得簫字

長林飛鳥亦王喬挈榼留歡暑氣銷驚座不妨人共適作
羹那惜自爲調名齊洛下何須社隱學淮南豈待招奈可
同聲慚大雅頻持土缶和瓊簫

漫興寄王敬美時王辭兩浙學憲之命

園廬禽息謝招尋雨過池塘洗道心衣褐十年辭聖主
披裘五月委遺金饔飧隨分田中硯山水無絃膝上琴有
客來談外間事釋時聊復問王沉

龍節推君善過訪談白嶽之勝漫作贈之

翩翩標格出風塵駐節長林訪隱淪不倚仙郎年弱冠肯
嫌貧士岸綸巾官當列宿龍爲姓賦就凌雲筆有神白嶽
玄都饒勝覽談鋒能遣臥遊新